

馬文正公傳家集

卷一至卷七

欽定四庫全書

卷一百一十五

司馬文正公傳家集卷第一

後學桂林陳弘謀重訂

古賦

交趾獻奇獸賦

嘉祐三年八月二十七日

皇帝御天下三十有六載化洽於人德通於神邇無不
協遠無不臻粵有交趾來獻麒麟其爲狀也熊頸而鳥
喙豨首而牛身犀則無角象而有鱗其力甚武其心則
馴蓋遐方異氣之產故圖諜靡得而詢於是降輶車之
使發旁縣之民除塗於林嶺之隘引舟於江淮之濱曠
時月而涉萬里然後得入覲于中宸與夫雕題卉服之
士南金象齒之珍款紫闥而全入充彤庭而並陳於是

羣公卿士百僚庶尹儼然垂紳薦笏旅進而稱曰陛下
功冠邃古化侔儀極恭承神祇嚴奉宗稷純孝烝烝小
心翼翼出入起居不忘於訓典進退周旋必咨於軌則
體文王之卑服遵大禹之菲食宮室觀臺無礱刻之華
輿馬器用無珠玉之飾遊必備於法駕燕不廢於朝夕
此皆帝王所不能爲而陛下行之尚不忘於怵惕是以
方內乂寧黎民滋殖垂髫之童耳皆習於詩禮戴白之
叟目不睹夫金革至於根著浮流跂行喙息無不翔舞
太和涵濡茂澤此殊俗所以響臻靈獸所以來格雖漢
室之初黑鵬貢於絕徼周家之隆白雉通於重譯殆不
足方也臣等謂宜命協律播之聲歌詔太史編之簡策

以發揮不世之鴻休張大無倫之不績不亦偉乎皇帝
乃穆然深思愀然不怡曰吾聞古聖人之治天下也正
心以爲本修身以爲基閨門睦而四海率服朝衆和而
羣生悅隨故務其近不務其遠急其大不急其微今邦
雖康未能復漢唐之宇俗雖阜未能追堯舜之時況物
尚疵癘而民猶怨咨朕何敢以未治而忘亂未安而忘
危享四方之獻當三靈之釐且是獸也生嶺嶠之外出
沮澤之湄得其來吾德不爲之大縱其去吾德不爲之
虧奈何貪其琛賁之美悅其鱗介之奇容其欺紿之語
聽其諂諛之辭以惑遠近之望以爲蠻夷之嗤不若以
迎獸之勞爲迎士之用養獸之費爲養賢之資使功烈

烜赫聲明歲黜廢耳目一日之玩爲子孫萬世之規豈
不美歟於是羣臣拜手稽首咸曰此盛德之事臣等愚
戇所不及陛下誠有意於此臣等敢不同心竭力對揚
而行之皇帝於是御棧樸之篇觀大畜之繇延黃髮之
儒顯巖穴之秀善有可旌無間於幽遠言有可采不棄
於微陋位匪德而不升官無能而不授使稷契居左皋
夔立右伊呂在前周召侍後相與講經藝之淵原覽皇
王之步驟求大化之所未孚訪惠澤之所未究興民之
利若癯夫飢渴除民之害若憂夫疾疢賜予簡而功無
所遺刑罰清而姦無所漏浮費省而物不屈於求須苛
役蠲而農不妨於耘耨使之夏有葛而冬有裘居有倉

而行有糗絲續之饒足以養其老甘脆之餘足以慈其
幼地不加廣而百姓足賦不加多而縣官富道塗之人
恥爭而喜讓閭閻之俗棄漓而歸厚戶知禮義之方人
享期頤之壽然後旃裘之長頓顙而讐服祝髮之渠回
面而奔走靡不投利兵而襲冠帶焚僭服而請印綬於
是三光澄清萬靈敷佑風雨時若百稼豐茂休氣充塞
殊祥輻湊甘露霏霖於林薄醴泉甯沸於嵌竇華莖羅
植於堦庀朱草叢生於庭雷鳳凰長離駢枝而結巢黃
龍騶虞羣友而爲畜由是觀之則彼裔夷之凡禽瘴海
之怪獸皮不足以備車甲肉不足以登俎豆夫又何足
以耗水衡之芻而汙百里之囿者哉

稷下賦

齊王樂五帝之遐風嘉三王之茂烈致千里之奇士總
百家之偉說於是築鉅館臨康衢盛處士之遊壯學者
之居美矣哉高門橫閼夏屋長檐罇罍明潔几杖清嚴
爾乃雜佩華纓淨冠素履端居危坐規行矩止相與奮
髯橫議投袂高談下論孔墨上述羲炎樹同拔異辨是
分非榮譽樵株爲之蓊蔚訾毀珵美化爲瑕疵譬若蘭
芷蒿莎布濩於雲夢之泓鴻鵠鵝鷀鼓舞於渤澥之涯
於是齊王沛然來遊欣然自喜謂稷下之富盡海內之
美慨乎有自得之志矣祭酒荀卿進而稱曰吾王闢仁
義之塗殖詩書之林安人之慮廣致治之意深然而諸

侯未服四鄰交侵士有行役之怨民有愁痛之音意者
臣等道術之淺薄未足以稱王之用心故也王曰先生
之責寡人深矣願卒聞之對曰臣聞之珉珎亂玉魚目
間珠泥沙漲者其泉恩莠莠茂者其穀蕪網者棄綱而
失叙行者多岐而喪塗今是非一槩邪正同區異端角
進大道羈孤何以齊蹤於夏商繼軫於唐虞誠能撥去
浮末敦明本初修先王之典禮踐大聖之規模德被品
物威加海隅忠正修列讒邪放踈行其言不必飽其腹
用其道不必煖其膚使臣飯梁藟肥而餐驕君之祿不
若荷鉏耒耨而爲堯舜之徒惜夫美食華衣高堂閑室
鳳藻鳴義豹文麋質誦無用之言費難得之日民未治

不與其憂國將危不知其失臣竊以大王爲徒慕養賢之名而未覩用賢之實也已

靈物賦

元豐元年六月二十七日作

有物於此制之則留縱之則去卷之則小舒之則鉅守之有主用之有度習之有常養之有素譽之不喜毀之不怒誘之不遷脅之不懼吾不知其何物聊志之於茲賦

司馬文正公傳家集卷第一

蘇州府學教授浦起龍校字

司馬文正公傳家集卷第二

後學桂林陳弘謀重訂

古詩一

贈邵興宗

窮達有常分得喪難豫言古今浩茫茫倚伏安可原軒
裳彼自榮舉俗同崩奔錙銖校重輕冰火殊涼溫君子
固無愧立身明本根度矩苟不愆寵辱徒喧喧有如清
濟流橫貫長河渾景公馬千駟南面雄東藩陶青劉舍
徒位爲丞相尊當時非不顯磨滅何足論顏回在陋巷
藜藿甘盤餐原憲結敝衣蓬蒿塞其門當時豈不窮至
今榮名存况君齒方壯德業素所敦安知搨翅歸不作

凌雲翻要之白首期壯烈施元元爲君畫善策灑埽清
前軒長舒四五榻客來輒開樽羣愁喜伺人稍醒必煩
寃拒之亦無佗體中常昏昏

邵興宗南園草盛不翦僕過而愛之爲詩以贈
君家在何許遠與南城鄰車馬不甚繁門前無俗塵有
園廢鉏治繞舍皆荆榛入夏益滋蔓鬢鬢高没人豈無
舊桃李蕪雜與之均謂言彼草木於我奚疎親於間置
取舍豈得完天真不若任其然同受雨露仁物性且不
違人心何緇磷閉戶不迎客箕踞無冠巾苟忘軒冕心
何異巢居民

送文慧師 應符
歸眉山

至人心如雲去住唯所適飄飄涉四海豈復校喧寂
來王城遊紅塵暖晨夕忽思還故峯不可留宿昔離合
皆自然於何寄驪戚從茲坐林下白首傲泉石山鳥集
掌中巴猿侍瓶錫寺前煙蔓深何處求行跡

出都日塗中成

請告歸陝及之汾
陰省兄時所作

賤生習山野愚陋出於骨雖爲冠帶拘性非樊籠物揚
鞭出都門曠若解微紼是時天風惡靈沼波蕩汨龍蟄
互騫騰鷗羣遠浮沒川原寢疎豁煙火稍蕭瑟草木雖
未榮春態先髣髴桑稀林已斜柳弱條可屈蛛絲罥晴
陽鼠土墮新窟徐驅款段馬放轡不呵咄與爾同逍遙
紅塵免蓬勃

重經車輞谷

昔年道經車輞谷直上七里鹽南坡今年行役復到此
方春流汗如翻波中塗太息坐磐石涕泗不覺雙滂沱
我生微尚在邱壑強若麋鹿嬰虞羅人踰三十只有老
後時過此知如何雲泉佳處須速去登山筋力行蹉跎

送崔尉

堯封

之官巢縣

弱歲家淮南常愛風土美悠然送君行思逐高秋起巢
湖映微寒照眼正清泚低昂蹙荷芡明滅縈葭葦銀花
鱸肥魚玉粒炊香米居人自豐樂不與佗鄉比況得良
吏來倍復蒙嘉祉君爲太學生氣格已英偉登科如拾
遺舉步歛千里毋嫌位尚微觀政此爲始尊公久場屋

上國困泥滓豈不重相離念子勉爲理當令佳譽新
燧滿人耳高堂雖在遠聞之足爲喜何必羞三牲然後
稱甘旨

酬宋次道初登朝呈同舍

林葩積浮脆煙霧矜春姿山桂結芳堅冰霰橫秋枝夫
君名卿嗣華實雙葳蕤如何仕不偶通籍鬢生絲豈非
秋桂類不足煩嗟咨我今三十餘汨沒無佗奇正恐食
浮人敢言位猶卑同登天子廷自視誠非宜清朝正求
治諫路方坦夷太平可立致此任非君誰

奉同范景仁宋次道太常致齋韓廷評維見過
闍人不時內韓去乃知爲詩謝之

端居太常署寒日淡孤清取酒呼諸友談笑方縱橫韓
君士林秀四海依高名家襲鍾鼎貴身無簪組縈逍遙
風塵外萬物秋毫輕未嘗妄過人所過以爲榮如何枉
玉趾及門失相迎主人豈傲客事有迷誤并追延旣不
及相視徒嗟驚威鳳顧脩梧不下還孤征景星歛呈彩
旋有流雲生靈物固難覩俗眼真不明投謝有何物珉
石從雙瓊

送守哲歸廬山

哲公金陵來神韻自孤秀京華三十春高節愈幽茂烜
赫公卿門道俗日奔走自非趣尚合一息不相就慷慨
賢豪士波溢千金富蔬飯苟有餘秋毫未嘗受囂叟不

可變堅白如瓊琇居然尚愁寂終厭塵土臭忽思香爐
雲蒼蔚冠孤岫振衣尋昔遊煙霞宛如舊絡木藤蔓長
攫石松根瘦瀑泉響夜壑乳管添春竇茅茨蔭方丈宴
坐度清晝几席雨竒花階除馴猛獸方知物外樂回視
人寰陋慎勿露聲光愚迷將輻湊

清明後二日同鄰幾景仁次道中道興宗元明
秉國如晦公疎飲趙道士東軒以日暮天無雲
春風扇微和爲韻得和字

寂寥清明後餘春已無多閑軒富佳致不惜載酒過水
木晚尤秀風煙晴更和臨樽不盡醉奈此芳菲何

晉康陳生庸家世以孝悌聞有異木連理生其